

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার
সংখ্যা ৪৯/২০১৮-১৯

ঢাকা, বুধবার ১২ সেপ্টেম্বর ২০১৮, ২৮ ভাদ্র ১৪২৫

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে

- ১। কেউ যেন অভিজাত বেকারে পরিণত না হয় : রাষ্ট্রপতি
- ২। মাদ্রাসার উন্নয়নে ৬ হাজার কোটি টাকার প্রকল্প
একনেকে ১৭ হাজার ৭৮৬ কোটি টাকার ১৮ প্রকল্প অনুমোদন
- ৩। কোন নির্বাচনেই প্রভাব খাটিয়ে বিজয়ী হবার চেষ্টা করিনি : প্রধানমন্ত্রী
প্রধানমন্ত্রী শেখ হাসিনার সঙ্গে যুক্তরাষ্ট্রের রাষ্ট্রদূত বার্নিকাটের সাক্ষাৎ
- ৪। প্রধানমন্ত্রী সুপার স্পেশালাইজড হাসপাতালের ভিত্তিপ্রস্তর স্থাপন করবেন আগামীকাল
- ৫। আজ বিএসইসি'র রজতজয়ন্তী অনুষ্ঠান উদ্বোধন করবেন প্রধানমন্ত্রী
- ৬। বাংলাদেশ বিশ্বে ধান উৎপাদনে ৪র্থ, সবজিতে ৩য় এবং আলুতে ৭ম : সংসদে কৃষিমন্ত্রী
- ৭। দেশে বিশ্বমানের আধুনিক ডিজিটাল ম্যাপিং সিস্টেম চালু করা হয়েছে : সংসদে আইনমন্ত্রী
- ৮। রাজাকারদের তালিকা প্রণয়নের উদ্যোগ নেওয়া হয়েছে : সংসদে মুক্তিযুদ্ধবিষয়ক মন্ত্রী
- ৯। রাজস্ব আয় ৪ হাজার ৫৯৪ কোটি ৩২ লাখ টাকা : সংসদে ভূমিমন্ত্রী
- ১০। পরিত্যক্ত অবস্থায় রয়েছে দেশের ৫ বিমানবন্দর : সংসদে বিমানমন্ত্রী
- ১১। ইন্টারনেটে গুজব শনাক্তকরণ ও নিরসন কেন্দ্র প্রতিষ্ঠার উদ্যোগ নিচ্ছে সরকার : তথ্যমন্ত্রী
সোশ্যাল মিডিয়া পর্যবেক্ষণ করে গুজব চিহ্নিত করতে তথ্য অধিদফতরকে
ইমিডিয়েট রেসপন্স ওয়ার্কিং টিম গঠনের নির্দেশ তথ্য প্রতিমন্ত্রীর
- ১২। আগামী একনেকে উঠছে ইভিএম প্রকল্প : পরিকল্পনামন্ত্রী
- ১৩। রোহিঙ্গাদের উন্নয়নকাজে যুক্ত করবে না সরকার : পররাষ্ট্র প্রতিমন্ত্রী
- ১৪। শাহজালাল আন্তর্জাতিক বিমানবন্দরে ২৪ ঘণ্টা কার্গো সেবা চালু রাখার নির্দেশ প্রধানমন্ত্রী কার্যালয়ের
- ১৫। সংবাদপত্র ও সংবাদ সংস্থাগুলোর জন্য ৪৫ শতাংশ মহার্ঘ ভাতার প্রজ্ঞাপন জারি

১। কেউ যেন অভিজাত বেকারে পরিণত না হয় : রাষ্ট্রপতি

রাষ্ট্রপতি মোঃ আবদুল হামিদ উচ্চ শিক্ষার গুণগত মান নিশ্চিত করতে ইউজিসিকে শিক্ষার মান নির্ধারণ, তদারকিসহ বিশ্ববিদ্যালয়গুলোতে জবাবদিহিতা বাড়াতে আরও উদ্যোগী হতে বলেছেন। রাষ্ট্রপতি গতকাল (১১ সেপ্টেম্বর মঙ্গলবার) নগরীর একটি হোটেলে নবম ইউজিসি পদক প্রদান অনুষ্ঠানে ভাষণ প্রদানকালে বলেন, উচ্চশিক্ষার মান নিশ্চিত করতে আরও উদ্যোগী হতে হবে। বিশ্ববিদ্যালয়সমূহের চ্যান্সেলর রাষ্ট্রপতি মোঃ আবদুল হামিদ উচ্চ শিক্ষার প্রত্যেক স্তরে মূল্যায়ন ও তদারকি এবং এক্ষেত্রে ইউজিসি কর্তৃপক্ষের জোরালো ভূমিকার ওপর গুরুত্বারোপ করেন। তিনি ইউজিসি ও সংশ্লিষ্ট অন্যান্যদের বলেন, বিশ্ববিদ্যালয়ের ডিগ্রি অর্জনের পর কেউ যেন শিক্ষিত ও অভিজাত বেকারে পরিণত না হয় সেদিকে লক্ষ্য রাখতে হবে। সূত্র-সংবাদ (শেষ পৃ.,ক.১), ভোরের কাগজ (শেষ পৃ.,ক.১), ইন্ডিপেনডেন্ট (পৃ.৩,ক.২), ডেইলি সান (পৃ.২,ক.২)।

২। মাদ্রাসার উন্নয়নে ৬ হাজার কোটি টাকার প্রকল্প

একনেকে ১৭ হাজার ৭৮৬ কোটি টাকার ১৮ প্রকল্প অনুমোদন

দেশের ১ হাজার ৬৮১টি মাদ্রাসার উন্নয়নে ৫ হাজার ৯৮১ কোটি ৬৩ লাখ টাকা ব্যয়ে একটি প্রকল্প অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। 'নির্বাচিত মাদ্রাসাসমূহের উন্নয়ন' শীর্ষক প্রকল্পের মাধ্যমে বিভাগীয় শহর, উপকূল অঞ্চল, পাহাড়ি এলাকা, হাওর অঞ্চলসহ দেশের ১ হাজার ২৩৪টি আলীয়া মাদ্রাসায় চারতলা ভবন নির্মাণ করা হবে। ভবনগুলোয় সোলার প্যানেল ও প্রয়োজনীয় আসবাবপত্রও দেওয়া হবে। গতকাল (১১ সেপ্টেম্বর মঙ্গলবার) শেরেবাংলা নগরে এনইসি সম্মেলনক্ষেত্র প্রধানমন্ত্রী ও একনেক চেয়ারপারসন শেখ হাসিনার সভাপতিত্বে অনুষ্ঠিত বৈঠকে প্রকল্পটি অনুমোদন করা হয়। একনেক সভায় মোট ১৮টি প্রকল্প অনুমোদন দেওয়া হয়েছে। এগুলো বাস্তবায়নে মোট খরচ ধরা হয়েছে ১৭ হাজার ৭৮৬ কোটি ৯৫ লাখ টাকা। এর মধ্যে সরকারি তহবিল থেকে ১৩ হাজার ৮১৩ কোটি ৪৪ লাখ টাকা, বাস্তবায়নকারী সংস্থা থেকে ৪২ কোটি ৬২ লাখ টাকা এবং বৈদেশিক সহায়তা থেকে ৩ হাজার ৯৩০ কোটি ৮৯ লাখ টাকা ব্যয়ের লক্ষ্য রয়েছে। সূত্র-ইত্তেফাক (পৃ.১,ক.৭), সংবাদ (শেষ পৃ.,ক.২), নিউজ টুডে (পৃ.১,ক.৮), ডেইলি স্টার (পৃ.৫,ক.৫)।

৩। কোন নির্বাচনেই প্রভাব খাটিয়ে বিজয়ী হবার চেষ্টা করিনি : প্রধানমন্ত্রী

প্রধানমন্ত্রী শেখ হাসিনার সঙ্গে যুক্তরাষ্ট্রের রাষ্ট্রদূত বার্নিকাটের সাক্ষাৎ

প্রধানমন্ত্রী শেখ হাসিনা আগামী নির্বাচনকে অবাধ, সুষ্ঠু ও নিরপেক্ষভাবে আয়োজনে তাঁর সরকারের পদক্ষেপসমূহ তুলে ধরে বলেছেন, অনেক নির্বাচনেই আমরা পরাজয় বরণ করেছি, এমনকি খুব সামান্য ব্যবধানেও পরাজিত হয়েছি। কিন্তু কোন নির্বাচনেই প্রভাব খাটিয়ে বিজয়ী হবার চেষ্টা করিনি। বাংলাদেশে নিযুক্ত যুক্তরাষ্ট্রের রাষ্ট্রদূত মার্সিয়া রুম বার্নিকাট গতকাল (১১ সেপ্টেম্বর মঙ্গলবার) প্রধানমন্ত্রী শেখ হাসিনার সঙ্গে তাঁর সরকারি বাসভবন গণভবনে সৌজন্য সাক্ষাৎ করতে গেলে তিনি এ কথা বলেন। বৈঠক শেষে প্রধানমন্ত্রীর প্রেস সচিব ইহসানুল করিম বলেন, তাঁরা পারস্পরিক স্বার্থসংশ্লিষ্ট বিভিন্ন বিষয়ে আলোচনা করেন। তাঁদের আলোচনায় আসন্ন নির্বাচন, রোহিঙ্গা শরণার্থীদের প্রত্যাবাসন বিষয়ে যুক্তরাষ্ট্রের সহযোগিতা এবং বিদ্যুৎখাতে সহযোগিতার বিষয়গুলো উঠে আসে। সূত্র-ইত্তেফাক (পৃ.১৯,ক.৫), সংবাদ (শেষ পৃ.,ক.৫), নিউ নেশন (শেষ পৃ.,ক.৬), অবজারভার (শেষ পৃ.,ক.২)।

৪। প্রধানমন্ত্রী সুপার স্পেশালাইজড হাসপাতালের ভিত্তিপ্রস্তর স্থাপন করবেন আগামীকাল

বঙ্গবন্ধু শেখ মুজিব মেডিকেল বিশ্ববিদ্যালয়ের অধীনে এক হাজার শয্যার সুপার স্পেশালাইজড হাসপাতাল প্রকল্পের ভিত্তিপ্রস্তর স্থাপন ও সেন্টার অব এক্সিলেন্স প্রকল্পের স্থাপনাসমূহের উদ্বোধন হতে যাচ্ছে। প্রধানমন্ত্রী শেখ হাসিনা আগামীকাল (১৩ সেপ্টেম্বর বৃহস্পতিবার) এ প্রকল্পসমূহের ভিত্তিপ্রস্তর স্থাপন ও উদ্বোধন করবেন। সুপার স্পেশালাইজড হাসপাতাল নির্মাণে দক্ষিণ কোরিয়া সরকার ইউসিএফ-এর অর্থায়নে ১০৪৭ কোটি টাকা ঋণ সহযোগিতা প্রদান করবে। ১৩ তলা হাসপাতাল ভবনটিতে থাকবে ১ হাজার শয্যা। দেশের প্রথম সেন্টার বেইজড চিকিৎসাসেবা চালু হবে সুপার স্পেশালাইজড হাসপাতালটিতে। সূত্র-ইত্তেফাক (পৃ.৩,ক.৫), জনকণ্ঠ (পৃ.১,ক.৭), অবজারভার (শেষ পৃ.,ক.৫)।

৫। আজ বিএসইসি'র রজতজয়ন্তী অনুষ্ঠান উদ্বোধন করবেন প্রধানমন্ত্রী

সংস্থার পঁচিশ বছর পূর্তি উপলক্ষে সপ্তাহব্যাপী রজতজয়ন্তী অনুষ্ঠানের আয়োজন করেছে বাংলাদেশ সিকিউরিটিজ এন্ড এক্সচেঞ্জ কমিশন (বিএসইসি)। রাজধানীর বঙ্গবন্ধু আন্তর্জাতিক সম্মেলনকেন্দ্রে আজ (১২ সেপ্টেম্বর বুধবার) সকাল ১০টায় এ অনুষ্ঠানের উদ্বোধন করবেন প্রধানমন্ত্রী শেখ হাসিনা। গত ১০ সেপ্টেম্বর সোমবার দুপুরে আগারগাঁওয়ের বিএসইসি কার্যালয়ে এক সংবাদ সম্মেলনে এ কথা জানান সংস্থাটির নির্বাহী পরিচালক। সূত্র-আমাদের অর্থনীতি (পৃ.১,ক.৫)।

৬। বাংলাদেশ বিশ্বে ধান উৎপাদনে ৪র্থ, সবজিতে ৩য় এবং আলুতে ৭ম : সংসদে কৃষিমন্ত্রী

কৃষিমন্ত্রী বেগম মতিয়া চৌধুরী সংসদকে জানিয়েছেন, কৃষি ও খাদ্য উৎপাদন বৃদ্ধিতে সরকার বিগত ৯ বছরে ৬০ হাজার ২৬৮ কোটি ৭৫ লাখ টাকা ভর্তুকি দিয়েছে। কৃষকদের উৎসাহিত করার কারণে বর্তমানে বাংলাদেশ বিশ্বে ধান উৎপাদনে ৪র্থ, সবজি উৎপাদনে ৩য় এবং আলু উৎপাদনে ৭ম স্থান অবস্থানকারী দেশ হিসেবে পরিচিতি লাভ করেছে। গতকাল (১১ সেপ্টেম্বর মঙ্গলবার) সংসদে এক প্রশ্নের জবাবে তিনি এ কথা বলেন। সূত্র-ইত্তেফাক (পৃ.১৭,ক.৫), সংবাদ (পৃ.১৬,ক.৪), নিউজ টুডে (পৃ.২,ক.৮)।

৭। দেশে বিশ্বমানের আধুনিক ডিজিটাল ম্যাপিং সিস্টেম চালু করা হয়েছে : সংসদে আইনমন্ত্রী

বাংলাদেশ জরিপ অধিদফতরের পুরাতন এনালগ ম্যাপিং সিস্টেম পরিবর্তন করে বিশ্বমানের আধুনিক ডিজিটাল ম্যাপিং সিস্টেম চালু করা হয়েছে। অধিদফতরের জনবলকে দেশে-বিদেশে পর্যাপ্ত প্রশিক্ষণ প্রদানের মাধ্যমে ডিজিটাল ম্যাপ প্রণয়নের জন্য দক্ষ করে তোলা হয়েছে। মিরপুরের ধামালকোটে বাংলাদেশ জরিপ অধিদফতরের অফিস ভবনে ডিজিটাল ফটোগ্রামেট্রি, জিআইএস এবং ডিজিটাল কার্টোগ্রাফি ল্যাব সংবলিত আধুনিক ম্যাপিং সেন্টার স্থাপন করা হয়েছে। গতকাল (১১ সেপ্টেম্বর মঙ্গলবার) জাতীয় সংসদ অধিবেশনে এক প্রশ্নের জবাবে আইনমন্ত্রী এডভোকেট আনিসুল হক এ তথ্য জানান। সূত্র-জনকণ্ঠ (পৃ.২,ক.১)।

৮। রাজাকারদের তালিকা প্রণয়নের উদ্যোগ নেওয়া হয়েছে : সংসদে মুক্তিযুদ্ধবিষয়ক মন্ত্রী

রাজাকার, আলবদর ও মানবতাবিরোধী তালিকা প্রকাশের বিষয়ে উদ্যোগ গ্রহণ করা হয়েছে বলে জানিয়েছেন মুক্তিযুদ্ধবিষয়ক মন্ত্রী আ ক ম মোজাম্মেল হক। গতকাল (১১ সেপ্টেম্বর মঙ্গলবার) জাতীয় সংসদে স্বাধীনতায়ুদ্ধে রাজাকারদের পূর্ণাঙ্গ তালিকা প্রকাশ এবং তাদের নাগরিক সুবিধা সংকোচনের কোনো পরিকল্পনা আছে কিনা এমন প্রশ্নের জবাবে তিনি এ কথা জানান। সূত্র-ভোরের কাগজ (পৃ.৮,ক.৫)।

৯। রাজস্ব আয় ৪ হাজার ৫৯৪ কোটি ৩২ লাখ টাকা : সংসদে ভূমিমন্ত্রী

সারাদেশে ভূমির খাজনা বাবদ বিগত ২০০৯-১০ থেকে ২০১৭-১৮ এ পর্যন্ত ৯ অর্থবছরে মোট ৪ হাজার ৫৯৪ কোটি ৩২ লাখ ৩ হাজার ৫০ টাকা রাজস্ব আদায় হয়েছে বলে জানিয়েছেন ভূমিমন্ত্রী শামসুর রহমান শরীফ। গতকাল (১১ সেপ্টেম্বর মঙ্গলবার) সংসদ অধিবেশনে এক প্রশ্নের জবাবে মন্ত্রী এ তথ্য জানান। সূত্র-ভোরের কাগজ (পৃ. ৮,ক.৭)।

১০। পরিত্যক্ত অবস্থায় রয়েছে দেশের ৫ বিমানবন্দর : সংসদে বিমানমন্ত্রী

দেশের পাঁচটি বিমানবন্দর দীর্ঘদিন ধরে পরিত্যক্ত অবস্থায় রয়েছে বলে জানিয়েছেন বেসামরিক বিমান পরিবহণ ও পর্যটনমন্ত্রী এ কে এম শাহজাহান কামাল। গতকাল (১১ সেপ্টেম্বর মঙ্গলবার) জাতীয় সংসদ অধিবেশনে এক প্রশ্নের জবাবে মন্ত্রী এ তথ্য জানান। মন্ত্রীর দেওয়া তথ্যানুযায়ী পরিত্যক্ত বিমানবন্দরগুলো হচ্ছে, ইশ্বরদী, ঠাকুরগাঁও, শমসেরনগর লালমনিরহাট ও কুমিল্লা বিমানবন্দর। তিনি জানান, এ বিমানবন্দরগুলোর মধ্যে ইশ্বরদী, ঠাকুরগাঁও ও শমসেরনগর বিমানবন্দর চালু করার পরিকল্পনা আছে সরকারের। সূত্র-ভোরের কাগজ (পৃ. ৮,ক.১)।

১১। ইন্টারনেটে গুজব শনাক্তকরণ ও নিরসন কেন্দ্র প্রতিষ্ঠার উদ্যোগ নিচ্ছে সরকার : তথ্যমন্ত্রী

সোশ্যাল মিডিয়া পর্যবেক্ষণ করে গুজব চিহ্নিত করতে তথ্য অধিদফতরকে ইমিডিয়েট রেসপন্স ওয়ার্কিং টিম গঠনের নির্দেশ তথ্য প্রতিমন্ত্রীর ইন্টারনেটে অপপ্রচার বন্ধে গুজব শনাক্তকরণ ও নিরসন কেন্দ্র প্রতিষ্ঠার উদ্যোগ নিচ্ছে সরকার। নিরাপদ সড়কের দাবিতে শিক্ষার্থীদের আন্দোলনের সময় গুজব ছড়ানোসহ ইতোপূর্বে বিভিন্ন গুজব ছড়ানোর প্রেক্ষাপট বিবেচনায় নিয়ে এ উদ্যোগ নেওয়া হচ্ছে। আন্তঃমন্ত্রণালয় সভার পাশাপাশি প্রধানমন্ত্রীর সঙ্গে এ বিষয়ে আলোচনা করে চূড়ান্ত সিদ্ধান্ত নেওয়া হবে বলে তথ্যমন্ত্রী হাসানুল হক ইনু জানিয়েছেন। সোশ্যাল মিডিয়া পর্যবেক্ষণ করে গুজব চিহ্নিত করতে আগামী ১৫ দিনের মধ্যে তথ্য অধিদফতরকে একটি 'ইমিডিয়েট রেসপন্স ওয়ার্কিং টিম' গঠনের নির্দেশনা দিয়েছেন তথ্য প্রতিমন্ত্রী তারানা হালিম। রাজধানীর সিরডাপ মিলনায়তনে মঙ্গলবার 'গুজব : গণমাধ্যম ও সামাজিক মাধ্যমের ভূমিকা' শীর্ষক মতবিনিময় সভায় এ কথা জানানো হয়। তথ্যমন্ত্রী বলেন, সামাজিক যোগাযোগ মাধ্যম আসার আগেও গুজব রটনার অপসংস্কৃতি ছিল। সাধারণ অপরাধী, ব্ল্যাকমেলা, বিদেশি চর ও মহল গুজব রটায়। অপরাধের সঙ্গে যারা জড়িত তারাও গুজবকে হাতিয়ার হিসেবে ব্যবহার করে। রাজনৈতিক মহল রাজনৈতিক উদ্দেশ্যে গুজব রটনা এবং মিথ্যাচার করে থাকে। নিজেদের রক্ষা করতে চাইলে গুজব শনাক্তকরণ ও নিরসন কেন্দ্র সরকারিভাবে স্থাপন করা দরকার। প্রধান তথ্য কর্মকর্তা কামরুন নাহারের সভাপতিত্বে সভায় প্রধানমন্ত্রীর তথ্য উপদেষ্টা ইকবাল সোবহান চৌধুরী, তথ্য সচিব আবদুল মালেক ছাড়াও তথ্য মন্ত্রণালয়ের অধীন কয়েকটি প্রতিষ্ঠানের শীর্ষ কর্তারা গুজব নিয়ে নিজেদের মত তুলে ধরেন। সূত্র-জনকণ্ঠ (পৃ.১,ক.৮), সংবাদ (শেষ পৃ.,ক.১), ডেইলি সান (পৃ.১,ক.৫), ডেইলি স্টার (পৃ.৩,ক.১)।

১২। আগামী একনেকে উঠছে ইভিএম প্রকল্প : পরিকল্পনামন্ত্রী

বহুল আলোচিত ইলেকট্রনিক ভোটিং মেশিন বা ইভিএম প্রকল্প অনুমোদনের জন্য জাতীয় অর্থনৈতিক পরিষদের নির্বাহী কমিটি (একনেক) এর আগামী বৈঠকে উপস্থাপন করা হবে। গতকাল (১১ সেপ্টেম্বর মঙ্গলবার) অনুষ্ঠিত একনেক বৈঠক শেষে সংবাদ সম্মেলনে এক প্রশ্নের জবাবে পরিকল্পনামন্ত্রী আ হ ম মুস্তফা কামাল এ তথ্য জানান। তিনি বলেন, আগামী নির্বাচনে স্বল্প পরিসরে ইভিএম ব্যবহার হতে পারে। তবে চূড়ান্ত সিদ্ধান্ত নেবে নির্বাচন কমিশন। সূত্র-ইত্তেফাক (শেষ পৃ.,ক.১), সমকাল (শেষ পৃ.,ক.৮), নিউজ টুডে (পৃ.১,ক.১), ডেইলি স্টার (পৃ.৩,ক.৬)।

১৩। রোহিঙ্গাদের উন্নয়নকাজে যুক্ত করবে না সরকার : পররাষ্ট্র প্রতিমন্ত্রী

পররাষ্ট্র প্রতিমন্ত্রী শাহরিয়ার আলম বলেছেন, কব্রাজার ও চট্টগ্রাম কেন্দ্রিক কোনো উন্নয়নকাজে রোহিঙ্গাদের এখনই সম্পৃক্ত করার ঝুঁকি নেবে না সরকার। তবে রোহিঙ্গারা যেন নিজ দেশে ফিরে গিয়ে কিছু করতে পারে সেজন্য

তাদের দক্ষতা বাড়ানোর কাজ করা হবে। মিয়ানমারের সঙ্গে সুসম্পর্ক বজায় রাখতে চায় বাংলাদেশ এমনটা জানিয়ে প্রতিমন্ত্রী বলেন, তবে মাদক ও রোহিঙ্গা ইস্যুতে বাংলাদেশের অবস্থান কঠোর। গতকাল (১১ সেপ্টেম্বর মঙ্গলবার) রাজধানীর রাওয়া কনভেনশন সেন্টারে অক্সফামের উদ্যোগে রোহিঙ্গা সম্পর্কিত একটি প্রতিবেদন প্রকাশ অনুষ্ঠানে তিনি একথা বলেন। সূত্র-যুগান্তর (পৃ.৩,ক.৫), সমকাল (পৃ.৩,ক.২), ডেইলি স্টার (শেষ পৃ.,ক.১), বাংলাদেশ টুডে (পৃ.১,ক.২)।

১৪। শাহজালাল আন্তর্জাতিক বিমানবন্দরে ২৪ ঘণ্টা কার্গো সেবা চালু রাখার নির্দেশ প্রধানমন্ত্রীর কার্যালয়ের

শাহজালাল আন্তর্জাতিক বিমানবন্দরে ২৪ ঘণ্টা কার্গো সেবা চালু রাখতে প্রয়োজনীয় সব পদক্ষেপ নিতে সংশ্লিষ্ট কর্তৃপক্ষগুলোকে জরুরি নির্দেশ দিয়েছে প্রধানমন্ত্রীর কার্যালয়। আমদানি কার্যক্রম চালু রাখতে এ জন্য ব্যাংকগুলোর এলসি ওপেনিং ব্রাঞ্চ শনিবারও খোলা রাখার নির্দেশ দেওয়া হয়েছে। প্রধানমন্ত্রীর কার্যালয়ে গতকাল (১১ সেপ্টেম্বর মঙ্গলবার) এক বৈঠকে এসব নির্দেশ দেওয়া হয়। প্রধানমন্ত্রীর মুখ্য সচিব মো. নজিবুর রহমান বৈঠকে সভাপতিত্ব করেন। সূত্র-ভোরের কাগজ (শেষ পৃ.,ক.৫), ইত্তেফাক (পৃ.৩,ক.৭), ইন্ডিপেনডেন্ট (পৃ.১৫,ক.৫)।

১৫। সংবাদপত্র ও সংবাদসংস্থাগুলোর জন্য ৪৫ শতাংশ মহার্ঘ ভাতার প্রজ্ঞাপন জারি

সরকার সংবাদপত্র ও সংবাদসংস্থাসমূহে নিয়োজিত সাংবাদিক, প্রেস শ্রমিক ও সাধারণ কর্মচারীদের জন্য মূল বেতনের ৪৫ শতাংশ হারে অন্তর্বর্তীকালীন মহার্ঘ ভাতা ঘোষণা করেছে। তথ্য মন্ত্রণালয় গতকাল (১১ সেপ্টেম্বর মঙ্গলবার) এ সংক্রান্ত এক প্রজ্ঞাপন জারি করে। ১ মার্চ ২০১৮ থেকে বেতনবৃদ্ধির এ আদেশ কার্যকর এবং অন্তর্বর্তীকালীন এ সুবিধা পরবর্তীতে ঘোষিতব্য সামগ্রিক বেতন কাঠামোর সঙ্গে সমন্বয় করা হবে বলে তথ্য মন্ত্রণালয়ের প্রজ্ঞাপনে উল্লেখ করা হয়। সূত্র-ইত্তেফাক (পৃ.১,ক.১), সংবাদ (শেষ পৃ.,ক.৫), অবজারভার (পৃ.১,ক.১), নিউ নেশন (শেষ পৃ.,ক.১)।

সম্পাদকীয়

- ক. ইত্তেফাক :** সরকারি খাদ্যগুদামের পাচার হওয়া চাল-আটা কালোবাজারে বিক্রির ঘটনা র্যাভের ভ্রাম্যমাণ আদালতের অভিযানে ধরা পড়ার কথা উল্লেখ করে এ অসাধু চক্রের বিরুদ্ধে কঠোর শাস্তির ব্যবস্থা করার সুপারিশ।
- খ. ইনকিলাব :** হাইকোর্ট রাজধানীর হাতিরঝিল ও বেগুনবাড়ির পরিকল্পিত উন্নয়ন প্রকল্প এলাকায় গড়ে ওঠা নকশা বহির্ভূত ও অবৈধ স্থাপনা সরিয়ে ফেলার নির্দেশ হাইকোর্ট দিয়েছে উল্লেখ করে এ নির্দেশনা মেনে সংশ্লিষ্ট সব মহল ত্বরিত প্রয়োজনীয় ব্যবস্থা নেবে বলে প্রত্যাশা ব্যক্ত।
- গ. ভোরের কাগজ :** ‘ঢাকা সিটি ডিজিটাল মনিটরিং সিস্টেম’ নামে নতুন করে ডিএমপি ১৬ হাজার ক্লোজ সার্কিট ক্যামেরা বসানোর সিদ্ধান্ত নিয়েছে উল্লেখ করে যথাযথ রক্ষণাবেক্ষণ নিশ্চিত করা গেলে এগুলো জননিরাপত্তা রক্ষায় পুলিশের সহায়ক হবে বলে মতপ্রকাশ।
- ঘ. সংবাদ :** নির্বিচারে গাছ কাটা ও বনের জমি দখল করে ঘর বাড়ি নির্মাণের ফলে খাদ্য ও আবাস সংকটে মারা পড়ছে লাউয়াছড়া জাতীয় উদ্যানের বন্যপ্রাণী এ খবরে উদ্বেগ প্রকাশ করে বনবিভাগকে দ্রুত এ সমস্যা সমাধানে নজর দেওয়ার সুপারিশ।
- ঙ. জনকণ্ঠ :** সড়কে শৃঙ্খলা ফেরাতে মহাসড়কে লেগুনার চলাচল নিষিদ্ধ করার কথা উল্লেখ করে জনদুর্ভোগ কমাতে লেগুনার বিকল্প যানের ব্যবস্থা করার ওপর গুরুত্বারোপ।
- চ. নিউজ টুডে :** রাজধানীর রাস্তায় বেপরোয়াভাবে মোটর সাইকেল চালানোয় তা দুর্ঘটনা ও যানজটের কারণ হচ্ছে উল্লেখ করে এ ব্যাপারে কার্যকর পদক্ষেপ নেওয়ার সুপারিশ।

উপসম্পাদকীয়

সমকাল পত্রিকায় প্রকাশিত কলামে উল্লেখ করা হয়েছে, গণতন্ত্রকে প্রাতিষ্ঠানিক রূপদানের জন্য দরকার গণতান্ত্রিক রাজনৈতিক দলগুলোর যৌথ প্রয়াস এবং গণতান্ত্রিক সংস্কৃতি বিকাশের চর্চার পথটি সুগম করা।

নিবন্ধ ও ফিচার

ইত্তেফাক পত্রিকায় প্রকাশিত ‘পলিথিন ও নগরের জলাবদ্ধতা’ শিরোনামের নিবন্ধে অভিমত প্রকাশ করা হয়েছে, নাগরিকরা সচেতন হলে নিয়ন্ত্রিত হতে পারে পলিথিনের ব্যবহার।

#

